

DISPÕÑO:

Artigo primeiro. *Adición dun novo artigo 85 bis ó Regulamento do imposto sobre sucesións e doazóns, aprobado mediante o Real decreto 1629/1991, do 8 de novembro.*

Engádeselle o artigo 85 bis ó Regulamento do imposto sobre sucesións e doazóns, aprobado mediante o Real decreto 1629/1991, do 8 de novembro, nos seguintes termos:

«Artigo 85 bis. *Fraccionamento da cota derivada das cantidades percibidas en forma de renda por contratos de seguro sobre a vida.*

1. Nos seguros sobre a vida nos que o causante sexa, pola súa vez, o contratante do seguro individual ou o asegurado no seguro colectivo e o importe do cal perciban os beneficiarios en forma de renda, vitalicia ou temporal, estes deberán integrar na base imponible o valor actual desa renda.

2. O valor actual da devandita renda acumularase ó resto de bens e dereitos que integran a porción hereditaria do beneficiario.

3. O beneficiario poderá solicitar, durante o prazo previsto no artigo 67.1.a) deste regulamento, o fraccionamento da parte da cota resultante de aplicar sobre o valor actual da renda, vitalicia ou temporal, deducida de se-lo caso a cantidade prevista no artigo 20.2.b) da Lei 29/1987, do 18 de decembro, do imposto sobre sucesións e doazóns, o tipo medio de gravame.

Entenderase por tipo medio de gravame o derivado de multiplicar por 100 o cociente resultante de dividi-la cota tributaria total que debe ingresar-lo contribuínte polo valor total dos bens e dereitos que integran a súa base liquidable. Este tipo medio de gravame expresarase con dous decimais.

4. A Administración competente para a exacción do imposto acordará o fraccionamento no número de anos en que se perciba a renda, se fose temporal, ou en quince anos se fose vitalicia, non esixíndose a constitución de ningún tipo de caución nin producíndose xuros de demora.

A Administración competente notificaralle ó contribuínte a resolución da súa solicitude no prazo de tres meses. Se transcorrido ese prazo non se notificou resolución expresa, a solicitude considerarase estimada. Só poderá desestimarse a solicitude se esta está incompleta ou non cumpre cos requisitos fixados na norma.

5. O importe do ingreso anual correspondente ó pagamento fraccionado resultará de dividi-la cota que se fracciona entre o número de anos en que se perciba a renda se fose temporal, ou entre quince se fose vitalicia.

O pagamento anual fraccionado ingresarase nos prazos que figuren na resolución de concesión do fraccionamento, dentro do mes de xaneiro seguinte á percepción íntegra de cada anualidade de renda.

6. No suposto en que se exerza o dereito de rescate, a totalidade dos pagamentos fraccionados pendentes deberán ingresarse durante os trinta días seguintes a tal exercicio.

7. No suposto en que se produza a extinción da renda, só resultará esixible o pagamento fraccionado pendente que corresponda á anualidade de renda efectivamente percibida e pendente de ingreso.

8. A responsabilidade subsidiaria das entidades de seguros extínguese en relación co primeiro pagamento fraccionado cando o beneficiario acre-

dite a obtención, en forma expresa ou por silencio, do fraccionamento regulado no presente precepto.

O mantemento da extinción da responsabilidade esixe a acreditación polo contribuínte ante a entidade de seguros do ingreso do pagamento fraccionado correspondente a cada anualidade de renda.

No suposto do exercicio do dereito de rescate, as entidades de seguros poderán esixi-la presentación de certificación expedida pola Administración tributaria sobre o importe do imposto pendente de pagamento, para os efectos de coñecer-la contía da súa responsabilidade subsidiaria e, se é o caso, poderlles entregar ós beneficiarios un cheque bancario expedido a nome da Administración acreedora do imposto, de acordo co previsto no artigo 8.1.b) da Lei 29/1987, do 18 de decembro, do imposto sobre sucesións e doazóns.»

Artigo segundo. *Modificación do número 1 do artigo 87 do Regulamento do imposto sobre sucesións e doazóns, aprobado mediante o Real decreto 1629/1991, do 8 de novembro.*

Modifícase o número 1 do artigo 87 do Regulamento do imposto sobre sucesións e doazóns, aprobado mediante o Real decreto 1629/1991, do 8 de novembro, nos seguintes termos:

«1. Os suxeitos pasivos que opten por determina-lo importe das súas débedas tributarias mediante autoliquidación deberán presentala no modelo de impreso de declaración-liquidación especialmente habilitado para o efecto, procedendo a ingresar-lo seu importe dentro dos prazos establecidos no artigo 67 deste regulamento para a presentación de documentos ou declaracións ou no de prórroga do artigo 68, na entidade de depósito que presta o servizo de caixa na Administración tributaria competente ou nalgunha das súas entidades colaboradoras.»

Disposición derradeira primeira. *Habilitación normativa.*

Autorízase o ministro de Facenda para dicta-las disposicións necesarias para a aplicación deste real decreto.

Disposición derradeira segunda. *Entrada en vigor.*

Este real decreto entrará en vigor o día seguinte ó da súa publicación no Boletín Oficial del Estado.

Dado en Madrid o 22 de febreiro de 2002.

JUAN CARLOS R.

O ministro de Facenda,
CRISTÓBAL MONTORO ROMERO

4917 *REAL DECRETO 207/2002, do 22 de febreiro, polo que se modifica o Regulamento do imposto sobre transmisións patrimoniais e actos xurídicos documentados, aprobado mediante o Real decreto 828/1995, do 29 de maio. («BOE» 61, do 12-3-2002.)*

A Lei 1/1998, do 26 de febreiro, de dereitos e garantías dos contribuíntes, imponse á Administración tributaria o deber de lle facilitar ó contribuínte o cumprimento

das súas obrigas fiscais, de modo que a intervención deste se leve a cabo na forma menos gravosa posible, sempre que iso non supoña un prexuízo para a Facenda pública e o interese xeral.

O obxectivo de redución da presión fiscal indirecta resulta necesario tanto por razóns de cumprimento da legalidade vixente, en particular os artigos 2.2 e 20 da Lei 1/1998, do 26 de febreiro, de dereitos e garantías dos contribuíntes, como por razóns de carácter técnico, dado que un sistema tributario eficiente debe cumprir co principio de economicidade, de maneira que se reduzan ó mínimo os gastos ocasionados pola xestión e recadación tributaria, tanto para a propia Administración como para o contribuínte.

A redacción ata o de agora vixente do Regulamento do imposto sobre transmisións patrimoniais e actos xurídicos documentados, aprobado polo Real decreto 828/1995, do 29 de maio, obrigaba o contribuínte a practicar autoliquidación e ingresa-lo importe resultante na entidade de depósito que presta o servizo de caixa nas oficinas de xestión tributaria da Administración tributaria competente, sen que resultase posible a utilización da vía de ingreso a través dunha entidade bancaria colaboradora.

A existencia dun único sistema de ingreso ocasiona dificultades nunha eficiente xestión tributaria, de modo que resulta necesario introducir as modificacións pertinentes de maneira que a Administración tributaria competente poida permitirles ós contribuíntes a realización do ingreso das débedas tributarias a través de entidade colaboradora.

Na súa virtude, por proposta do ministro de Facenda, de acordo co Consello de Estado e logo de deliberación do Consello de Ministros na súa reunión do día 22 de febreiro de 2002,

DISPÕÑO:

Artigo único. *Modificación do Regulamento do imposto sobre transmisións patrimoniais e actos xurídicos documentados, aprobado mediante o Real decreto 828/1995, do 29 de maio.*

Modifícase o número 1 do artigo 107 do Regulamento do imposto sobre transmisións patrimoniais e actos xurídicos documentados, aprobado mediante o Real decreto 828/1995, do 29 de maio, nos seguintes termos:

«1. O suxeito pasivo, dentro do prazo establecido no artigo 102.1 anterior, practicará a autoliquidación e ingresará o seu importe na entidade de depósito que presta o servizo de caixa na Administración tributaria competente ou nalgunha das súas entidades colaboradoras.»

Disposición derradeira primeira. *Habilitación normativa.*

Autorízase o ministro de Facenda para dicta-las disposicións necesarias para a aplicación deste real decreto.

Disposición derradeira segunda. *Entrada en vigor.*

Este real decreto entrará en vigor o día seguinte ó da súa publicación no Boletín Oficial del Estado.

Dado en Madrid o 22 de febreiro de 2002.

JUAN CARLOS R.

O ministro de Facenda,
CRISTÓBAL MONTORO ROMERO

MINISTERIO DE FOMENTO

4919 *REAL DECRETO 259/2002, do 8 de marzo, polo que se actualizan as medidas de seguridade na utilización das motos náuticas. («BOE» 61, do 12-3-2002.)*

O incremento constante do parque de motos náuticas e dos seus niveis de potencia impón a necesidade de aproba-las normas de seguridade necesarias para reducir o risco de accidentes que a súa utilización comporta, tanto para quen as manexa como para os bañistas, en razón da proximidade á costa onde esta actividade se practica.

Este real decreto vén cumprir, en desenvolvemento das previsións contidas no artigo 86.1 da Lei 27/1992, do 24 de novembro, de portos do Estado e da mariña mercante, esta finalidade. Para iso, amplíase substancialmente o alcance das normas de seguridade ata o de agora vixentes contidas na Orde do 22 de xullo de 1999, pola que se establecen medidas de seguridade para o goberno de motos náuticas, créase crea unha nova titulación náutico-deportiva, dividida en tres categorías, necesaria para a navegación con estes artefactos, ata o de agora exenta deste requisito, e impóñense ás empresas dedicadas ó alugamento de motos unhas obrigas de funcionamento destinadas a garanti-la utilización das motos das que dispoñan en condicións de seguridade.

Por outra parte, a Orde do 16 de decembro de 1998 pola que se regula o procedemento abreviado de rexistro e matriculación das motos náuticas, prevé exclusivamente o procedemento de matriculación de motos utilizadas con fins recreativos, deportivos ou comerciais. Sen embargo, a versatilidade destes artefactos náuticos traduciuse en que a súa utilización alcance tamén as administracións públicas e entidades públicas dedicadas a funcións de salvamento de vidas humanas, as embarcacións das cales deben inscribirse na lista oitava do Rexistro de Matrícula de Buques regulado no Real decreto 1027/1989, do 28 de xullo, sobre abandeiramento, matriculación de buques e rexistro marítimo, respecto das cales a citada orde omite calquera referencia. Este real decreto vén suplir este baleiro, ó establece-las normas necesarias para levar a cabo esta matriculación.

Desde a perspectiva da súa adecuación á ordenación constitucional de competencias, as medidas establecidas neste real decreto constitúen, de conformidade co previsto no artigo 6.1.c) da Lei 27/1992, normas reguladoras da mariña mercante, materia que o artigo 149.1.20.^a da Constitución atribúe, con carácter exclusivo, ó Estado.

Na súa virtude, por proposta do ministro de Fomento, de acordo co Consello de Estado e logo de deliberación do Consello de Ministros na súa reunión do día 8 de marzo de 2002,

DISPÕÑO:

Artigo 1. *Obxecto.*

Este real decreto ten por obxecto establece-las medidas de seguridade apropiadas para o goberno das motos náuticas que naveguen polo mar territorial español e regula-las modalidades da súa utilización.

Así mesmo, establece as regras necesarias para a matriculación das motos náuticas que sexan propiedade ou estean á disposición de organismos públicos e se utilicen en tarefas de vixilancia, ou de institucións dedicadas ó salvamento marítimo e de vidas humanas no mar.